



## **SAKSFRAMLEGG**

|                                     |                          |
|-------------------------------------|--------------------------|
| <b>Sakshandsamar:</b> Jan Erik Boge | <b>Arkivkode:</b> FE-630 |
| <b>Arkivsaksnr:</b> 19/831          | <b>Løpenr:</b> 19/7331   |
| <b>Sakstype:</b> Politisk sak       |                          |

### **SAKSGANG**

| <b>Styre, utval, komité m.m.</b> | <b>Møtedato</b> | <b>Saksnr</b> |
|----------------------------------|-----------------|---------------|
| Kommunestyret                    | 24.10.2019      | 069/2019      |

## **Streaming av kommunestyret og formannskapet sine møte**

### **24.10.2019 Kommunestyret:**

Handsaming i møtet:

Rådmannen sitt framlegg til vedtak vart samrøystes vedteke.

### **KS- 069/2019 Vedtak:**

Møta i kommunestyret og formannskapet skal streamast direkte på internett. I tillegg skal opptak frå møta vera tilgjengeleg på internett i eitt år etter møtedatoen.

### **Rådmannen sitt framlegg til vedtak:**

Møta i kommunestyret og formannskapet skal streamast direkte på internett. I tillegg skal opptak frå møta vera tilgjengeleg på internett i eitt år etter møtedatoen.

### **Kva saka gjeld:**

Kommunestyret sine møte har vorte streama direkte på internett sidan hausten 2015.

Kommunestyret vedtok 17.06.2015 (sak 019/15) ei prøveordning med direktestreaming av møta i perioden september – desember 2015. Det vart gjort ei evaluering av prøveordninga i desember 2015, og kommunestyret vedtok då (i sak 076/15) å vidareføra prøveordninga i heile kommunestyreperioden 2015-2019.

Formannskapet sine møte har vorte streama direkte på internett sidan våren 2018. Kommunestyret vedtok 26.04.2018 (sak 011/2018) at møta i formannskapet skulle streamast i ein prøveperiode ut 2018. Formannskapsmøta til no i 2019 har også vorte streama.

I tillegg til at møta vert direktestreama, ligg opptak frå møta tilgjengeleg på Youtube i eitt år.

Det er no behov for at kommunestyret tek stilling til om ordninga med direktestreaming og opptak av møta i kommunestyret og formannskapet skal vidareførast.

### Noverande teknisk løysing

I Samnanger har me til no brukt ei billeg og relativt enkel teknisk løysing for å streama møte på internett. Samla kostnad til nødvendig teknisk utstyr og programvare i perioden 2015 – 2019 har vore om lag 40.000 kroner (utgifter til lyd-/høgtalaranlegg i møterommet på biblioteket på Bjørkheim er ikkje teke med i denne kostnaden). Me har ikkje brukt fastmontert kamerautstyr, men utstyr som kan flyttast mellom kommunestyresalen og biblioteket på Bjørkheim. Dersom noverande ordning skal halda fram, vil det i utgangspunktet ikkje vera nødvendig med større investeringar i åra som kjem. Likevel må det nok påreknast utgifter på om lag 10.000 kroner pr. år til nødvendig utskifting av teknisk utstyr og utskifting/oppgradering av programvare.

### **Vurderingar og konsekvensar:**

Mange norske kommunar streamar kommunestyremøta sine, og dette vil truleg verta endå meir vanleg i åra som kjem. Ut frå dette vil det vera «merkeleg» dersom me i Samnanger no vel å slutta å streama kommunestyremøta våre. Sjølv om me vanlegvis ikkje har mange sjåarar på kvar direktesending (vanlegvis er det mellom 10 og 20 sjåarar), kan dette tilbodet vera verdifullt for dei som brukar det.

Opptaka frå kommunestyremøta som ligg på Youtube har ein god del visningar (frå ca 100 og opptil ca 500 visningar). Dersom ordninga med direktestreaming skal halda fram, bør også ordninga med at opptak av kommunestyremøta ligg på Youtube halda fram. Opptaka ligg i dag tilgjengeleg på Youtube i ca eitt år frå møtedatoen, men det kan sjølvstendig vurderast å la møta liggja tilgjengeleg lenger enn dette. Bakgrunnen for at det i 2015 vart bestemt at opptak frå møta berre skulle liggja tilgjengeleg i eitt år, var primært råd som ein annan kommune me var i kontakt med hadde fått frå Datatilsynet.

Streaming av formannskapsmøte er ikkje like vanleg som streaming av kommunestyremøte i norske kommunar. Likevel er det allereie i dag nokre kommunar som streamar formannskapsmøta sine. For Samnanger sin del ser «sjåartala» for formannskapsmøta ut til å vera litt lågare enn for kommunestyremøta, dette gjeld både for direktesendingane og opptaka som ligg på Youtube. Det er ikkje gjort noko evaluering av ordninga med streaming av formannskapsmøta.

Rådmannen rår til at direktestreaming av møta i kommunestyret og formannskapet vert gjort til ei fast ordning. Rådmannen rår òg til at ordninga med at opptak frå møta er tilgjengelege på Youtube i eitt år etter møtedatoen, vert vidareført som ei fast ordning.

Det kan òg vera aktuelt å vurdere om møta i naturutvalet skal streamast. Administrasjonen vil kunne leggja fram ei sak om dette dersom kommunestyret ber om det. Ei utfordring vil vera at det på møte som vert streama bør vera to representantar frå administrasjonen til stades. Dette inneber at det er behov for meir personalressursar på slike møte enn på møte som ikkje vert streama.

Det er teknisk tilrettelagt for streaming med noverande løysing både i møtesalen på kommunehuset og i møterommet på biblioteket på Bjørkheim.

### Alternativ teknisk løysing for streaming

Mange kommunar som streamar politiske møte på internett, brukar ei løysing som er spesialtilpassa for kommunar («KommuneTV» levert av firmaet Aventura). Ei løysing med «KommuneTV» vil truleg gje noko betre bilde- og lydqualität enn Samnanger si noverande ordning. I tillegg vil ei løysing med «KommuneTV» innehalda meir funksjonalitet for sjåarane enn den enkle Youtube-løysinga som Samnanger brukar. Dette gjeld mellom anna:

- Sjåarane vil via lenke i direktesendinga kunne opna saksframlegget/saksdokumenta for saka som er oppe til handsaming.
- Sjåarane vil også kunne opna saksdokumenta for andre saker som står på saklista til møtet.

Kostnadene for ei løysing med «KommuneTV» vil vera langt høgare enn Samnanger si noverande

løysing. Ei løysing med «KommuneTV» vil truleg kosta minst 100.000-150.000 kroner i investering (utstyr, konsulentutgifter/installasjon og programvare), pluss årlege utgifter på minst 15.000 – 20.000 kroner. Rådmannen rår av økonomiske omsyn til at Samnanger held fram med den same tekniske løysinga som me har brukt til no.